

Juni 17, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

Aruba tabatin un fin di siman tragico

Morto cruel den trafico y un caso di hogamento



ARUBA a conoce 2 morto tragico, E prome tabata diasabra madruga na altura di La Granja na Pos Chiquito, unda e motociclista, Edmard J.Q. Lampe, naci na Aruba, dia 9 di juni 1996 a bira di 7 morto den trafico di Aruba. El a caba di cumpli 23 aña di edad.

E di dos morto trágico a sosode algún ora después diasabra anochi, ora cu e Colombiano, Adelso Sandoval Castellanos, Colombia 17 december 1979 (39 aña), kende a dicidi di bay landa den e laman di Dos Playa, unda el a guli hopi awa, cu a costa su bida. Na famia di ambos fayecido ta bay nos mas sincero condolencia.

Minister Ruiz-Maduro ta informa:

Gobierno a yega na un formula nobo pa calcula prijs di gasolin



= exact

Solutions for Finance, Manufacturing,
Wholesale Distribution, Professional
Services, HRM, CRM and BPM

Business Processes
Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Supporting all
your business activities

Our goal is to understand and anticipate your business requirements. It means that everything we do is geared towards equipping you with solutions that will help you succeed as markets evolve

VCC
International NV

Exact. And it all comes together. Tel: 583-7072 | info@vcc.int.com | www.vcc-int.com

**INVEST
SECURE**

We don't just say it ... We Guarantee it !!!

ASIS
INTERNATIONAL
Advancing Security Worldwide®



Your security protection
partner since 1996

Tel: 582-7252

Everyone deserves a safe place to work,
live and play.

Despues di a bay landa den e laman bruto

Colombiano no a logra yega bek na tera y a guli masha awa



DIASABRA pa 18.49 Central di Polis ta haya informacion cu na Dos Playa un persona mester tin dificultad den awa y no a logra sali. Na jegada di patruya policial ya a logra saca e persona.



Personal di ambulance y coleganan di Cuerpo Policial a yega n'e sitio y a purba di reanima e persona pero envano.

A haci uso di helicopter pa transporta e victima mirando cu accsibilidad tabata dificil.

Pero pa 20.35, dr Texeir ta constata morto di: Adolfo Sandoval Castellanos, Colombia 17 december 1979 (39 aña).

Cuerpo Policial y nos di AWEMainta ta manda palabra di condolencia na famia di e fayecido.

Morto cruel pa hoben di 23 aña



TABATA diasabra 15 di juni 2019 pa 03.45 di madrugada, yamada a dreña via Central di Polis cu tin un accidente basta grave na altura di La Granja na Pos Chiquito.

Na yegada ta bin constata cu den e accidente tin un bromer y dos auto involvi. Cu maximo urgencia e chofer di e bromer wordo hiba pa hospital.

Pa 4.39 am dokter a constata morto di e motociclista, kende a keda identica como Edmard J.Q. Lampe, naci na Aruba, dia 9 di juni 1996. El a caba di cumpli 23 aña di edad. E ta yiu di e conocida personahe, Shulaika Ta On, kende no ta na Aruba ora di e accidente fatal aki. Su tata mes a muri algun aña atras. E hoben aki a bira asina e di 7 morto den trafico di Aruba.


N'e sitio chofer di ambos auto a wordo getest y a resulta positivo pa ta bou influencia di alcohol. Ambos a keda deteni y hiba Warda di Polis pendiente di mas investigacion.

Cuerpo Policial y nos di AWEMainta kier a manda palabranan di condolencia n'e famia di e fayecido.

Con e accidente aki a tuma lugar, ta ser investiga p'e exper-tonan di Polis di Trafico. Pa loke nos por a wak riba e grabacion di un camara di seguridad, dos auto, practicamente a "twist" e motociclista aki, ora nan a dal practicamente e frontal. E tabata un accidente horibel, si mira den ki estado e victima a keda. Polis a sera e caminda pa investigacion pa un bon rato. Por bisa te ora cu solo a sali a habri caminda atrobe.

Minister Ruiz-Maduro ta informa:

Gobierno a yega na un formula nobo pa calcula prijs di gasolin



GOBIERNO a bay over na usa un otro metodo pa calcula e prijs di benta di gasoline na Aruba saliendo for di e prijs riba factura cu RDA a paga pa e compra di gasoline teniendo na cuenta tambe reserva cu tin di e producto den tanki.

Pa largo tempo Gobierno a haci uso di e plataforma Platts pa calcula e prijs di producto petrolero basa riba un promedio di cual tabata e benta di e productonan aki riba e mercado internacional teniendo na cuenta un luna di retraso den dicho informacion.

Como cu RDA ta un compania di Gobierno di Aruba, a presenta e posibilidad pa yega na e factura di locual realmente ta wordo paga pa compra di gasoline y a base di esaki stipula e prijs di benta di gasoline pa publico. Antes ora cu e compra y abastecimento di producto petrolero tabata den man di multinacionales na Aruba, e informacion aki no tabata disponibel pa Departamento Economico na unda ta haci e calculo di prijs. P'esey pa largo tempo a recurri na e informacion cu Platts ta ofrece pa por a stipula e prijs di benta di producto petrolero na publico.

Ta absorba subida di periodo di transicion

Pa e periodo di transicion Gobierno a yega na un acuerdo cu RDA cu lo absorba gran parti di e subida grandi cu tabata tumando lugar na e momento ey y esaki a traduci su mes den un subida di 11,8 cent den

luna di mei 2019 cu mester conta como un subida total pa e lunanan di april, mei y juni pa cual RDA a cumpra y tin reserva di gasoline. Si no a haci e cambio di metodo y e areglo transitorio aki, Pueblo lo mester a conoce subida di prijs di gasoline den luna di april di 16 cent, subida di 13,9 cent den mei y un subida di 7,6 cent den juni. Cu e cambio aki Gobierno a percura pa trece tiki alivio den cartera di Pueblo.

Beneficio di e metodo nobo ta menos fluctuacion den prijs

Cu e manera di calcula prijs via e factura cu ta muestra kico realmente RDA a paga pa compra di gasoline riba mercado y teniendo na cuenta e prijs cu a ser paga pa e gasoline cu tin den reserva den tanki, ta spera di por yega na un prijs cu ta fluctua menos cu e prijs cu ta wordo stipula a base di e anotacion di Platts manera cu pa largo tempo a wordo haci pa Departamento Economico di Aruba.

Prijs di gasolin den juni ta mas abou cu e rebaho segun Platts

Riba e plataforma di Platts nos por mira cu prijs di gasoline a baha den luna di juni, pero asina mes cu den juni no a conoce rebaho di prijs, e calculo nobo a ofrece un prijs hopi mas abou y Pueblo a ricibi un alivio hopi mas grandi cu si mester a usa e prijs rebaha di Platts.

“Bankeronan” Chines a sali di bon cerca Hof

RECIENTEMENTE tabatin sentencia den e caso di un pareha Chines, kendenan a haci nan mes culpabel na “underground banking” durante un periodo di tres aña. Tanto e pareha como Ministerio Publico no tabata di acuerdo cu e sentencia di prome instancia y a apela e decision.

Ministerio Publico tabata di opinion cu e pareha durante un periodo di 3 aña a mobilisa rond di 13 miyon florin. Pero esey ta un pensamiento pasobra mester demostr’e tambe y locual nan no por a haci, y e ora a papia di 3 miyon dollar for di juli, 2012 te cu 31 di december, 2015.

Ta trata aki di Yifeng Wu y Yanqei Wu.

Corte den Prome Instancia a condena Yifeng na un castigo di 30 luna di cual 10 luna ta condicional y 3 aña di prueba. Procurador General durante e tratamento di Hof a pidi p’e un castigo di 3 aña y 6 luna, di cual 6 luna ta condicional y 3 aña di prueba. Banda di esaki a pidi pa impone un boet di 100 mil florin, y mayoria di loke a wordo confisca, manera cas, auto y oloshi, keda den man di husticia.

Den e caso di su pareha Yanwei Wu, el a haya un condena di 18 luna di cual 6 luna ta condicional y 3 aña di prueba. Den Hof, Procurador General a pidi un castigo di 30 luna di cual 15 luna ta condicional y 3 aña di prueba. Tambe el a pidi pa impone un boet di 50 mil florin. E caso aki tabatin di haber cu “underground banking”, unda tabata cambia dollars, sin cu nan tabatin



e permisonan necesario. Pero tambe di esaki tambe nan a wordo acusa di labamento di placa. Loke nan tabata gana, a cumpra cas, auto y otro obhetonan mas.

Ambos tabatin 4 acusacion contra nan, pero den ambos caso Hof a absolve nan di dos acusacion pasobra no a keda concretamente proba cu e transaccionnan aki a finalisa. Pa condena un persona p’esey, e mester a keda concretisa tambe.

E pareha tambe tabata dedica nan mas na “swipe” pa turistanan, esta cu ta duna nan dollars y a cambio tabata cobra cierto porcentahe pa nan.

Ta un investigacion cu a dura basta largo pa cual a tap telefon di varios comerciante te ora cu a logra haya suficiente prueba. E casnan cu nan a cumpra por ehempel, a busca un hypotheek na banco. Pero loke nan tabata paga pa luna tabata mas di loke nan a declara di tin mensualmente como entrada.

Hof na momento di dicta sentencia a tene na cuenta cu e pareha aki a hinca nan mes den e “negoshi” aki pa mehora nan situacion financiero y financia nan estilo di bida di luho.

A haci esaki sin controla e clientenan, si nan ta bini di takinan di terrorismo. No por haci otro cu impone un castigo pa ambos.

Si Hof a bisa cu e castigo ta diferente cu loke PG a pidi pa motibo cu nan a haya “vrijspraak” pa dos acusacion.

Riba Yifeng a impone un castigo di 24 luna di cual 12 luna ta condicional, kitando e tempo cu el a sinta caba y un boet di 100 mil florin.

Den e caso di Yanwei Wu, a impone un castigo di 12 luna, pero completamente condicional, 3 aña di prueba y un boet di 50 mil florin. Tambe a impone 120 ora di trabou pa comunidad y si e no ehecuta esaki, e lo mester sinta 60 dia.

Minister Armando Rudy Lampe

Docentenan cu ya caba tin un fulltime job den enseñansa, no ta humano pa bolbe duna nan un tarea mas den Traimerdia

MINISTER Armando Rudy Lampe ta kere cu mescos cu ta respeta derecho di esnan cu ta traha na Traimerdia, mescos mester respeta e derecho di e muchanan tambe, pesey mes den futuro ta spera cu tur stakeholder na Aruba tuma na cuenta cu muchanan cu ta bin pa ricibi guia lo no por wordo laga un banda.

Minister Armando Rudy Lampe ta kere cu e les cu nos tur a siña di dje n'e momentonan aki ta cu nos mester keda enfoca riba e derecho di mucha, paso e mucha ta central. Sinembargo Minister Lampe ta compronde cu cambionan aunke con chikito e por ta, ta crea intrankilidad.

Un di e cambionan cu a trece padilanti caba ta p'esnan cu ya caba ta maestro di scol durante full e parti di mainta y despues merdia nan mester prepara nan lesnan y kijk na nan lesnan p'e siguiente dia, pero cu tur esaki riba dje tin acerca Traimerdia banda di su trabao di 8 ora den dia, esaki por trece consecuencia, pesey mes Minister Armando Rudy Lampe kier proteha nos maestronan.

Berdad cu Aruba tin scarsedad di maestra y maestro y esnan cu tin, Gobierno no ta desea di overbelast nan y tampoco pa nan negligisha nan trabao dor di cansancio. Loke cu ta un realidad e trabao di un maestra of maestro dia pa dia ta mas dificil y e ta un cansancio mental.



E decision a keda tuma p'e maestronan cu ya caba tin un fulltime job di 8 ora den enseñansa, no ta humano pa bolbe duna nan un tarea mas den Traimerdia, p'e motibo aki mes a pone un stop na e parti aki pa proteha e maestronan p'asina nan por enfoca y duna les parti mainta unda cu e estudiante den dia ta haya e atencion necesario.

Esaki ta un di e cambionan chikito cu a keda implementa y cu ta creando cierto inseguridad serca esnan cu ta trahando den Traimerdia. Ta importante pa keda motiva nos muchanan pa sigui e bunita trabao di maestra debi cu hopi di nos docentenan ta bahando cu pensioen y cu ta causa cu Aruba ta bay tin mester di hopi maestra y maestro pa re-emplasa e cuponan.

Si esnan cu ta den Traimerdia kier crece pa drenta e trayecto di enseñansa, ta keda cupo p'e studiantenan cu ta studiando pa Asistente di Maestro drenta Traimerdia.

No ta na Aruba so, pero na Hulanda y otro paisnan a haci diferente investigacion cuanto un docente por keda duna les. Na momento cu un maestro ta overwerkt, e no ta funciona optimal y e por yega n'e extremo di perde control di e situacion y esey ta netamente loke cu kier evita. Mester tin seguridad p'e muchanan cu ta den enseñansa den dia y tambe seguridad p'e muchanan di Traimerdia.

Esaki ta rekeri tambe cu un maestra y/of maestro ta den balans cu su mes. Banda di tur esaki mayoria maestra y maestro tin un famia y tambe tin nan propio yiu cu mester di nan atencion tambe.



Na november entrega electronico di impuesto ta bay na vigor

PA hopi aña tin un proceso di digitalisacion tumando lugha na Servicio di Impuesto DIMP. Den Presupuesto di Pais Aruba pa 2018 a aloca un suma extra pa asina DIMP por agilisa e proceso di digitalisacion. Varios cambio a wordo introduci y ta premira cu otro aña ta asina leu cu Pueblo lo por haci su 'aangifte' via electronico.

Durante e reunion e Directora hunto cu mas ehecutivo di DIMP y representante di e compania Gravity cu ta asesora e departamento gubernamental di DIMP, a brinda un splicacion di e trabounan cu ya a keda cla y cual trabounan ainda ta pendiente. Hunto cu e proceso di digitalisacion ta trahando pa por caba cu e retraso cu tin. Asina ta procesa den 2019, e informacion fiscal di aña 2015 y 2016, y den 2020 lo procesa 2017 y 2018.

Esaki ta importante pa sobra asina Pueblo no mester bay warda largo mas pa haya restitucion. Na e momento aki DIMP ta den e proceso di transicion pa pasa di e sistema bieu pa esun nobo cu tambe ta den funcion caba. Na september awo e transicion lo keda finalisa y di e manera aki ta bay alivia e situacion na

unda cu foutnan den cobranza por pasa pa olvido. Cu e cambio aki tambe na november proximo ta bira posibel pa haci entrega electronico di e cobransanan di impuesto cu ta ser cobra pa luna y finalmente na mitar di aña 2020 ta premira cu por bay over na haci 'aangifte' di tur otro impuesto via electronico.



AVONDHAVO ARUBA

Durf de uitdaging aan!!!

Ben je gemotiveerd om je HAVO-diploma of VWO certificaten te behalen?

Schrijf je NU in!

Je kan je online registreren en inschrijven vanaf 17 juni tot en met 9 juli 2019
Je bent pas ingeschreven wanneer alle documenten zijn ingeleverd.

Informatie en instructie om je in te schrijven zijn te vinden op onze website:

www.avondhavoaruba.com.

Let op:

1. Schoolverklaringen voor de DIMAS en SVB en andere worden vanaf 4 september 2019 afgegeven.
2. Administratiekosten en examengeld worden niet gerestitueerd.
3. Schoolgeld kan niet in termijnen worden betaald. We hebben een swipe-machine voor de maestro-kaart. Cash-geld wordt niet geaccepteerd.



Premier Evelyn Wever-Croes:

Cumbre di Premiernan di Aruba, Corsou y St Maarten na Corsou

“Si nos haci cosnan hunto, nos ta mas fuerte para pa enfrentra tur e retonan”

DIALUNA 17 di juni ta tuma luga na Corsou e siguiente reunion entre e tres Prome Ministernan di Aruba, Corsou y Sint Maarten. E cumbre di e tres Premiernan a cuminsa desde aña pasa ora cu Premier Evelyn Wever-Croes, Premier Eugene Rhuggenaath y Premier Leona Marlin a drenta recién den Gobierno di nan respectivo pais. Ya tawata tin varios reunion na tur tres pais.

Den e cumbre di Corsou, lo tin 11 punto di agenda cu lo wordo discuti, entre otro e tema di Venezuela y con hunto e tres islanan por para riba e mesun linea pa atende cu e impacto di e crisis migratorio di Venezuela tin riba nos islanan. Ta conoci pa tur hende cu e impacto di e problema aki ta hopi grandi y cu ta tuma hopi tempo di e gobernantenan. Pa cua motibo, Premier Evelyn Wever-Croes ta bisa cu ta hopi importante pa ta para riba e mesun linea pa fortalece otro den tur e retonan cu e islanan ta enfentando.

E tema di integridad ta un tema cu lo sigui haya atencion den e cumbre di tres Premiernan. Pa Gobierno di Aruba esaki ta un tema hopi importante. Gabinete Wever-Croes tin un agenda hopi ambicioso riba e tereno di integridad. Y ta hopi importante pa Aruba, Corsou y Sint Maarten cana hunto tambe y yuda otro caminda cu por y tin mester. E expertonan cu ta trahando y ta dispuesto pa traha riba e tereno aki no ta hopi riba e islanan. Aruba na e momentonan actual tin un problema pa haya un hefe di e departamento nobo Bureau Integridad cu ta tardando Aruba pa ehecuta e plannan mas lihe.



“Ta importante pa crea un grupo cu expertonan di Aruba, Corsou y Sint Maarten pa hunto comparti trabounan sperando cu esaki lo alivia e tareanan”.

Un punto cu e biaha aki lo ta pa prome biaha riba agenda den e Cumbre di e Premiernan ta eGovernment. Despues di e biahe di Estonia, Premier Wever-Croes a comparti cu su homologonan di Corsou y Sint Maarten, e vision y experencianan di e cooperacion cu Aruba tin cu Estonia. Sint Maarten ya caba tambe ta trahando cu Estonia riba eGovernment. Corsou ta den e proseso pa inventarisa den ki direccion e kier bay.

“Si nos haci cosnan hunto, nos ta mas fuerte para pa enfrentra tur e retonan. Despues cu e reunionnan tuma luga, lo mi duna un relato mas amplio tocante tur e puntonan cu a wordo trata den e reunion di e 3 Premiernan cu lo tuma luga na Corsou dialuna”, Premier Evelyn Wever-Croes a enfatisa.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Un dia determinante pa futuro di procesamiento di desperdicio na Aruba

Cu un destaho publico cu a conoce un compania local cu a entrega oferta pa remedia y elimina dump na Parkietenbos



DIABIerna dia 14 di juni ultimo, tabata un dia sumamente importante pa Aruba y su futuro sostenibel. Manera cu a bay ta anuncia, desde cu a inicia e proceso pa logra yega na mihor maneho di desperdicio na Aruba (mas cu 1 año pasa), Gobierno a sa di informa y educa continuamente den forma transparente tocante locual ta tumando lugar.

META

E sistema cu Gobierno di Aruba a scoge yama ‘capping’, cual ta un sistema cu ta enfoca riba baha e sero di dump di Parkietenbos mas tanto cu ta posibel. E meta ta pa yega na un nivel cu ta responsabel (14-15 meter) como cu e punto di mas halto actualmente ta 25 meter!

Intencion ta pa logra ‘tapa’ esaki di un forma cu den futuro hende no lo sa mes cu tabatin un dump na e sitio, al contrario, lo crea un alivio enorme pa henter e becindario, aumentando calidad di aire den henter e becindario.

Esaki sigur ta trece alivio p’e habitantenan, teniendo na cuenta aspecto importante di salud y riesgonan cu e habitantenan a wordo exponi na dje durante hopi año. Pues logrando e meta aki ta contribui na hisa e calidad di bida tambe di nos ciudadanonan.

ENTREGAMENTO DI “PROPOSAL”

Diabierne a tuma lugar entrega di un proposal y tabata e momento final pa companianan interesa por entrega nan proposal. Un resultado di destaho publico cu a conoce un compania local cu a entrega oferta pa remedia y elimina e dump na Parkietenbos. Notaria Johnson tabata e testigo pa habri e pakete y percura pa registra tur documento ricibi conforme principianan di bon maneho.

Proximamente lo tuma lugar e fase di evaluacion pa mira si a base di e documentonan entrega, tin cumplimento cu tur rekisito stipula dor di Gobierno. Esaki di acuerdo cu e maneho cu Gobierno ta hiba pa brinda mihor proteccion na nos medio ambiente. Aplicando normanan/standardnan internacional di maneho di desperdicio sostenibel y amical pa medio ambiente asina respentand e derecho di e ser humano.

Pa Pais Aruba yega n’e punto aki ta marca un paso hopi importante, pasobra cu e logro aki Aruba ta marcando un paso mas cerca di e meta pa cera e dump Parkietenbos, cabando cu tur e consecuncianan negativo pa medio ambiente y salud di e ser humano asina salbuardando e futuro di nos siguiente generacionnan.



MINISTER Rudy Lampe hunto cu Prome Minister Evelyn Wever Croes a ricibi trahadornan di Traimerdia. E mandatario ta aprecia cu tur cos a bay den un bon ambiente y ta kere cu ta na mesa den dialogo ta yega na un solucion.

E delegacion cu a sinta na mesa hunto cu e mandatarionan a trece padilanti nan preocupacionnan y Prome Minister Evelyn Wever Croes a haci palabracion cu diarazon awor lo tin un contesta di parti di Prome Minister pa loke ta nan preocupacionnan.

Sinembargo e dialogo a bay positivo pa loke ta trata e trahadornan di Traimerdia.

Minister Armando Rudy Lampe

Ningun decision a perhudica of lo bay perhudica esnan cu ta traha na Traimerdia

Ya caba Traimerdia tabata den Parlamento cu e Comision Fiho di Enseñansa, unda nan a trece nan preocupacionnan y nan a ricibi nan contestanan tambe. E mandatario ta contento mirando cu varios di e preocupacionnan cu ya caba nan a haya contesta riba dje den e reunion cu Prome Minister no a keda treci mas padilanti. Esaki ta un progreso den e proceso di dialogo y esey ta positivo.

Loke cu tambe ta positivo di henter e situacion aki ta cu tin un grupo cu a acepta e mandatario su proposicion pa drenta e trayecto di enseñansa debi cu Aruba tin mester di trahadornan den e organo di enseñansa.

E mandatario a ofrece tur esnan den Traimerdia pa nan participa den e proceso di enseñansa combina cu un formacion p'asina despues bira Ondewijs Assistant of Maestro Certifica.

Minister Armando Rudy Lampe ta contento mirando cu tin un grupo cu a acepta e reto aki debi cu Aruba mester di nan y pa nan mes ta un adelanto tambe y un logro mas den bida. Tambe tin un otro grupo cu a dicide cu lo keda na Traimerdia, un proyecto cu sigur ta sumamente importante pa Aruba.

Raport di UNICEF for di 2013 a indica cu na Aruba nos tin un problema di negligencia di mucha debi cu e desaroyo economico a bay den un direccion cu bida a bira caro na Aruba, unda cu mama y tata mester traha y e muchanan tin biaha ta keda sin guia na cas.

Esaki no ta un situacion cu ta sano, p'e motibo aki mes Traimerdia tin un funcion hopi importante pa tin guia despues di oranan di skol.

Sinembargo esnan cu ta keda den e proyecto nan posicion huridico ta garantisa, esaki ta nifica cu un decision cu Gobierno tuma ta bay perhudica esnan cu ta trahando na Traimerdia.

E parti aki no mester ta un discucion mes debi cu ningun decision a perhudica of lo bay perhudica esnan cu ta traha na Traimerdia.

Tur lo keda cu nan posicion huridico, nan ta keda cu nan funcion di duna guia na nos muchanan unda cu e muchanan tambe ta sali beneficia cu e proyecto di Traimerdia.

Minister Armando Rudy Lampe ta spera cu pa e siman aki despues cu ricibi e contestanan di Prome Minister ta spera cu por haci mas avance pa loke t'e preocupacionnan cu nan tin y poco poco resolve tur nan preocupacionnan.



**TIMESHARE
FOR SALE BY OWNER**



**UNIT # 304 – WEEK 32
1 BEDROOM DELUXE SUITE
SLEEPS 5 PEOPLE**

- 2 X QUEEN BEDS
(1 IN BEDROOM & 1 PULLOUT BED IN LIVING ROOM)
- KITCHENETTE
- 3RD FLOOR
(BALCONY VIEW OVERLOOKING THE RESORT)

PRICE: \$5,500

**INTERESTED PLEASE CALL 583-1400
DURING OFFICE HOURS**

Curtis Fraser (POR) :

'Ta importante pa tin comunicacion habri entre tata y yiu pa kibra cultura di Taboo'



DEN conexion cu celebracion di Dia di Tata, Curtis Fraser di partido POR kier a tuma e oportunidad aki pa felicita tur tata riba nan dia y na mes momento comparti algun palabra di conocimiento pa refleha riba e dia aki ora ta trata e relacion entre un mayor y un muchacha.

Sr. Curtis Fraser ta enfatisa cu riba Dia di Tata aki laga nos ban refleha pa kico ta sumamente importante pa tene comunicacion habri cu nos yiunan y ta atento riba nan.

Sigur mirando nos situacion social recientemente, ta hopi esencial pa nos refleha riba algun punto cu actualmente ta keda bin cerca di nos comunidad manera casonan di abuso y maltrato.

“Prevencion mester ta un topico hopi grandi, pero e pregunta ta con ta bay preveni? Ki plan tin p’esaki y ki data tin ey’fo pa yuda cu prevencion?”, Curtis Fraser ta comenta.

CULTURA CU HOPI TABOO

E ta un simpel cos cu tin di haber cu nos cultura: educacion, y simplemente papiando tocante e temanan.

“Ainda nos tin hopi cos taboo, un cultura cu no ta papia cu otro tocante cosnan, no ta informa. E ta mas facil pa haci manera cu e no t’ey cu reconoce y haci algo, aki nos tin cu cuminsa”, Curtis Fraser ta expresa.

Un manera pa cuminsa cu esaki tambe segun sr. Fraser ta pa inclui e temanan di abuso y maltrato mandatorio den e curriculum di scol, p’e muchanan por ta consciente caba for di chikito.

Awendia tin hopi metodonan moderno con pa introduci e temanan aki den curriculum di scol p.e., y con pa por inclui e muchanan den un manera mas productivo. Bo tin programanan manera ‘toneelstukken’ of den cancionnan e.o. p’asina yuda e muchanan absorba e informacion na un forma mas adecuado y productivo.

“Nos tin miedo di bisa nos muchanan e cosnan aki pasobra nos tin miedo di introduci nan na un realidad cu nos mes tin miedo di dje. Pero berdad ta, mihor nos proteha nan, si no e monsternan den nos sociedad ta bay keda destrui bida di esnan mas inocente.

Esaki t’e realidad di mundo, y ta nos deber pa cuida nos yiunan for di esaki di tempran”, Curtis Fraser ta bisa. Fraser a conclui cu e ta necesario pa duna e muchanan e hermentnan p’asina nan por proteha nan mes y tambe pa por detecta cualkier tipo di problema for di tempran.



SK Click awor na Aruba cu un estilo fotografico



DIARANSON atardi den Indian Rock Garden a keda presenta na prensa e compania SK Click.

Nan a demostra e atardi / anochi aki e variacion dinamico di producto y tecnologia cu nan ta ofrece na clientenan corporativo, evento y coordinadonan di evento.

SK Click cu tin oficinanan na Reino Uni y awo na Aruba, a inverti mas di 50 mil dollar den tecnologia y a crea tres cupo di trabou cu plannan pa mas inversion den e proximo 12 lunanan. mientras cu nan ta crea experencianan fotografico inolvidabel.

SK Click lo yuda compania y marcanan pa presenta nan mes di un miho forma cu productonan manera SK Retro, SK Glam Cam, SK Mosaic y SK Roamer, cu ta un estilo fotografico exclusivo.

Segun Saskia Garrido, directora di SK Click Events Aruba, nan a cuminsa na Gran Britania y a pensa cu lo ta leuk tambe pa Aruba tin algo asina. A scohe cuatro producto exclusivo

Un di e aparatonan aki ta crea mosaico.

Esaki ta crea un ilustracion, den e caso aki di e Prikichi. Filomena College ta duna potret di alumnonan caminda cu SK Click a traha un bunita potret pa Aruba Birdlife Conservation.

E prikichi ta muriendo, segun Garrido. A dicidi e ora pa haci algo bunita pa tin un recuerdo di dje.

Pa loke ta servicionan, a scoge pa 4 producto exclusivo cu por wordo uza hunto of individualmente pa matrimonio, ocasionnan special, eventonan, campananan di mercadeo y hasta instalacionnan permanente (borchi). E ta un sistema divertido, interactivo cu ta duna e clientenan algo special y alabes mehora nan esfuersonan di mercadeo. Garrido a splica cu ta saca potret di e evento. Nan tin tambe uno cu ta traha digital, y esey por manda via email. Tambe tin posibilidad pa haci'e via texto riba telefon. Tur esaki por sosode instantaneo.

Hunto cu Filomena College

Garrido conoce Addonsito Croes cu kende el a yega di traha na Filomena College, unda cu e ta docente.



SK Click kier ta involvi cu e comunidad y duna algo bek. P'esey durante nan lansamento nan a devela un mosaico di e prikichi Arubano y di e forma aki duna mas publicidad di e trabou di Aruba Bird Life Conservation. Esey ta loke cu nan a haci cu studiantenan di Filomena College y a haci uzo di e fotografo Armando Goedgedrag. Un di e mosaiconan a bay pa ABC y e otro pa Filomena College.

Opinion

Parlamento, pretencioso sin base!?

Pa: Armand Hessels



E cuarenta cambianan cu Parlamento di Aruba recientemente a introduci den LAft, ta un violacion di e palabracionnan manera acorda den e Protocol di november 2018 entre Gobierno di Aruba y Hulanda.

No solamente a pasa e fecha cu mester a entrega y aproba e LAft nobo cu casi seis luna, tampoco a cumpli cu e palabracionnan cu lo adapta solamente articulo 14 di LAft, mientras cu Consejo di Ministro di Reino (CMR) lo mester bay di acuerdo cu contenido di e LAft nobo (Protocol di 22-11-2018, art. 2, 3 y 4).

Ta parece cu Parlamento di Aruba, cu su forma di proceder, concientemente a scoge pa un enfrentamento cu CMR. Den esaki e ta basa su mes riba e ponencia di Consejo di Consulta (CdC) cu en realidad LAft ta ilegal.

Pasobra pa medio di un ordenansa nacional e ta otorga un autoridad mas halto na instituto (CAft y CMR) cu no ta di Aruba. Mester regla esey pa medio di un 'Rijkswet' of un 'Algemene Maatregel van Rijksbestuur' (AmvR).

SOLUCION

Pues en realidad por soluciona e asunto aki facil y riba termino corto. Pa medio di un Rijkswet of AmvR enberdad por duna CAft y Gobierno di Reino e autoridad necesario.

Sin duda lo cambia tambe e nomber special di CAft den Cft. Pero...lo marginalisa Parlamento mas ainda di locual t'e caso awor.

MAGISTRAL

Aparentemente Parlamento kier a pone un fin n'e situacion insatisfactorio aki dor di duna su mes un papel hopi mas importante. Pasobra den esencia, intencion di e cambionan principal ta pa elimina CMR como supervisor y remplas'e pa Parlamento.

Esaki ta ricibi e 'conseho' di CAft, locual tin como consecuencia cu ta cancela e autoridad di CMR pa duna instruccion na Gobierno di Aruba en cuanto presupuesto.

Y voilà, Aruba a haya su autonomia financiero bek. Un hugada magistral, si no tabata pa historia di Parlamento cu no ta na su favor.

REFLECCION PROPIO

Desde e puro principio di Status Aparte te cu masha recien, Parlamento di Aruba ta caracteriza pa un disfuncionamento total. Apesar di tur conseho di CdC y Controlaria General (cu Parlamentario aparentemente no sa lesa!), Parlamento consecutivo di tur dos color politico a aproba tanto presupuesto normal como supletorio irealista un tras di otro practicamente sin ningun critica.

Apesar tambe di tur e fayonan legal y tecnico den e conceptonan di ley, Parlamento no tabatin ningun problema pa aproba nan practicamente ciegame. Tampoco Parlamento no a cumpli di ningun manera cu su tarea legal di controla

gasto di Gobierno: nunca den historia Parlamentario di Aruba, a trata un solo cuenta anual aproba pa un accountant!

Esey t'e pio pica mortal cu un Parlamento por comete. Asina e mes a excava su 'derecho di budget' sistematicamente.

E fracaso total aki di Parlamento durante 33 aña di Status Aparte t'e motibo principal cu finansa di Aruba por a derumba na un manera asina dramático.

FIGURANTE

Cu semehante historia, en realidad Parlamento di Aruba a disqualifica su mes como un 'supervisor' serio di Gobierno a base di e 'consehonan' di CAft.

Den politica di Aruba, normalmente conseho ta simplemente... conseho cu casi, pa definicion, no sa lesa, corda ehecuto, y pio si ta trata di un posibel 'instruccion' na Gobierno. Hopi lo caracteriza e intencion di Parlamento pa awor sí haci tur cos diferente, den e etapa aki como simpel 'servicio di lip'.

Pesey tambe CMR probablemente lo no tuma e 'accion Parlamentario' aki na serio. Consecuentemente e lo mester analisa -preferiblemente den dialogo cu Gobierno di Aruba- di ki manera lo por duna contenido lo mas efectivo na su responsabilidad na bienestar di comunidad di Aruba.

Si den esey Parlamento di Aruba lo (sigui) hunga simplemente e papel di figurante, ta algo cu en realidad e mester atribui exclusivamente na su mes!

Auto a bolter diadomingo mainta na Savaneta, chauffeur a resulta levemente herida



DIADOMINGO mainta pa mas o menos 10'or a.m, Polis a wordo notifica di un accidente serio riba caminda principal di Oranjestad pa San Nicolas.

Polis mesora a dirigi nan mes altura di Savaneta 349A, eynan un auto lo a bolter y bay cay den cura di un cas. Esaki ta situa un poco mas pabou di Savaneta Kamp.

Prome informacionnan tabata papia cu den e auto cu a bolter lo tin hende herida. Na yegada di Polis y ambulance enberdad nan a bin topa cu un auto Toyota completamente destrui benta den un cura di cas panort di caminda. E chauffeur danki Dios tabata levemente herida.

Mesora Paramediconan a cuminsa papia cune haciendo e algun pregunta y controle. E Toyota tabata bayendo direccion pariba, y pa un of otro motibo el a bay na su man robes perde control bolter y bay cay den cura di e cas. Esaki a causa daño tambe ta cura di e cas.

ATA a celebra 40 aña di servicio di Glennie Tromp



DIALUNA, 11 di juni, Oficina di Turismo a celebra 40 aña di servicio di Glennie Tromp. Glennie, t'e persona cu mas hopi aña di servicio na oficina di A.T.A. Na aña 1979, Glennie Tromp a inicia su carera na Algemene Dienst y despues a haya e oportunidad pa traha cu QEPD, sr. Betico F. Croes.

Glennie ta conta cu esaki sigur tabata un parti importante den su bida, mirando cu den e etapa aki su desarrollo profesional, esta su pasion pa sirbi pais Aruba a nace y te dia di awe, ta su fuente di inspiracion pa sigui traha pa nos destinacion.


Trahando den diferente departamento di e industria di turismo, Glennie a experencia e cambionan clave di turismo di Aruba. Na aña 1987 Aruba Tourism Authority tabata carga e nomber di Toeristen Bureau, unda Glennie a traha den Departamento di 'Public Relations'. Despues di esaki el a sigui su carera den e Departamento di 'Marketing', como 'Liaison' di Europa.

Na aña 2002, Glennie a traha hunto cu Minister di Turismo y Transporte y na aña 2008 el a biaha bay Hulanda pa traha p'e mercado di Spaña y Italia. Na aña 2011 Glennie Tromp a bolbe bek Aruba pa sigui na Aruba Tourism Authority como 'Marketing Executive'.

UN EHEMPEL DI PERSEVERANCIA, AMABILIDAD Y PROFESIONALISMO

Durante palabranan di elogio Ronella Tjin Asjoe-Croes, CEO di A.T.A. a indica cu: "E exito di Aruba su turismo ta grandemente mara na Bo persona. Bo ta para pa excelencia y no ta acepta menos. Bo ta keda reta Bo mes y keda segura cu A.T.A. y Aruba ta sigui presenta cosnan nobo y diferente.

E spirito di inovacion ta parti di ken Bo ta.



E experiencia y sabiduria cu Bo tin, Bo ta pasa pa hobennan y otronan tambe. Glennie sigur ta un di e miembronan 'clave' y 'esencial' di e ekipo di A.T.A. Danki! Danki pa 40 aña di dedicacion, y sigur di sacrificio tambe. PABIEN! Hopi bendicion!"

Glennie Tromp semper ta cla pa yuda su coleganan y semper a surgi como mentor p'esnan mas hoben cu ta bin haci nan pasantia dentro di A.T.A. Su pasion pa Aruba y su trabou a wordo subraya pa 'hopi' e siman aki y ta di admira.

Glennie ta un di e personanan cu te cu dia di awe ta masha conecta cu hopi den e industria di 'General Managers' di hotelnan te cu ehecutivonan di tur tempo y esnan nobo. Sin papia di esnan cu ta den e industria di turismo internacionalmente.

Esaki ta un di e fortalezanan di Glennie, su contactonan y curashi pa yega unda mester yega pa 'get the job done!' CMO di A.T.A., Sanju Luidens-Daryanani, como tambe Jerusha Rasmijn, Manager di Aruba Convention Bureau y un colega di hopi aña a subraya esaki.

Di parti Oficina di Turismo, danki pa 40 aña di dedicacion, pasion y profesionalismo! Ta un honor di por traha banda di Glennie Tromp, un persona ehemplar p'e oficina, pa turismo y pa nos comunidad. Pabien!

Minister Ruiz-Maduro a entrega 34 Certificado di e Tayer di 'Silver Entrepreneurship'



DIABIERNA ultimo Minister Ruiz-Maduro a entrega certificado na 34 participante di e tayer di “Silver Entrepreneurship” organisa pa IDEA cu ta un seccion di Departamento di Asuntonan Economico. E idea pa organisa e tayer “Silver Entrepreneurship Workshop” a bin di Minister Ruiz-Maduro cu a pidi IDEA pa traha riba un tayer special pa e personanan cu ta yegando e edad di pensioen of tin e edad di pensioen caba y cu kier cuminsa cu nan mesun negoshi. IDEA a hinca e tayer aki den otro y e siman tras di lomba a concretisa e idea aki den un tayer hopi informativo y na un forma gratuito na un grupo grandi di pensionado cu a muestra interes pa cuminsa cu nan mesun negoshi.

Estudionan ta indica cu dor di e avance den mundo di medicina, awendia un persona tin un averahe di 20 aña mas di bida desde e edad di pensioen. Ta un trend mundial cu e grupo di hendenan aki a base di nan conocimiento, experiencia y network ta cuminsa cu un negoshi na momento cu nan bay cu pensioen. Aruba ta conta cu hopi profesional cu ta bay cu pensioen y ta importante pa comunidad por sigui conta cu nan experticio y experiencia di un manera of otro segun e vitalidad di cada persona.

E tayer a trata diferente tema necesario pa por haya un bon conocimiento empresarial manera: e mindset cu mester tin pa habri un negoshi, proceduranan pa habri e tipo di negoshi cu bo ta desea y proceduranan pa si ta bay tuma empleado den servicio. Tambe a trata topiconan di impuesto,

mercadeo, aspectonan bancario y innovacion.

E mandatario ta remarca cu generalmente e grupo aki tin mas conocimiento, experiencia y ‘network’ pa por ta exitoso. Pa e motibo ey e tayer aki ta net e ‘push’ pa nan start nan mesun negoshi.

Minister Ruiz-Maduro a enfatisa cu Gobierno ta stimula negoshinan chikito y mediano, cu ta wes’i lomba di nos economia, pa asina contribui na un desaroyo fuerte y solido na economia di nos Pais Aruba, y den esaki e presencia di negoshinan maneha pa personanan cu mas edad, experiencia di bida, experticio di trabou y network amplio tin tur ingrediente pa ta exitoso.

Na final e mandatario a gradici tur ehecutivo di IDEA, Departamento di Asuntonan Economico, e facilitadornan y e participantenan pa a haci e tayer aki un exito. Un palabra di gratitud ta bay tambe na e partnernan Action Coach, SDG,

Trampolin pa Trabou, Johnson Notary Services, Benny Richardson, Best Buy Realty Aruba, SVB, Ginger Aruba Rosken, RBC, Futura, Merrill Robles, Santa Rosa, Accura Tax Consultancy, Invest Secure y Setar cu a haci e tayer aki uno exitoso.

Minister Ruiz-Maduro ta desea tur participante di e tayer “Silver Entrepreneurship” hopi exito cu nan futuro negoshi y ta pidi pa keda pendiente pa e proximo tayer yena cu informacion balioso.



Un V-car a bolter panort rotonde di Eagle



DIABIERNA anochi pa mas o menos 7:30 Unidad di Rescate di Cuerpo di Bombero, Ambulance y Polis a sali direccion di Blue Residence, unda un auto a bolter y chauffeur ta pega den e auto.

Esnan riba careteranan di Aruba y den area por a mira Materiaalwagen y Ambulance bayendo cu urgencia.

Mesora a cera e caminda dilanti Blue Residence den ambos direccion, pa di e manera eynan facilita e Unidadnan di Rescate traha libremente.

Na yegada, Polis a topa cu un auto V-car marca Hyundai riba su dak. Esaki tabata pega cerca di un pal'i luz tambe, indicando cu e pal'i luz a haya daño tambe.

E persona despues di un rato a wordo libera y transporta cu ambulance pa Hospital. Trafico den e area e stagna bastante pa un rato.

Parlamentario Robert Candelaria (AVP):

Intencion di Minister Rudy Lampe ta pa kita tur seguridad di scolnan

Mas y mas incertidumbre den enseñansa cu plannan sorpresivo

DIABIERNA merdia/atardi a tuma lugar un manifestacion pa demostra disgusto/mal contento riba e situacion andando cu Traimerdia. Parlamentarionan presente a ricibi e grupo di lidernan di Traimerdia cu a comparti cu nan kico tur ta locual cu ta e intrankilidad cu ta biba entre nan. Parlamentario Robert Candelaria a splica un poco mas kico tur ta locual a bin afo di e manifestacion aki.

Por a scucha for di e lidernan un preocupacion grandi, no solamente p'e cambionan cu kier introduci, pero tambe riba nan posicion huridico cu ta na peliger.

Por a tuma nota cu cada biaha e situacion ta bira mas y mas grandi y cu no tin trankilidad den enseñansa.

Robert Candelaria di su banda ta bisa cu biniendo di e banda di Seguridad y Husticia e no por a kere kico mas tin den su plan y cu e malcontento aki a uni hopi hende p'asina bin dilanti y trece nan disgusto n'e Minister encuestion.

“Mi a keda sorprendi na momento cu a sali na cla e intencion di Minister Lampe ta pa kita seguridad n'e scolnan, ademas di e disgusto cu ya caba a bin dilanti na momento cu e bisa cu ta bay uni algun scol y elimina Traimerdia” ta locual cu Parlamentario Robert Candelaria



a bisa.

Gabinete Wever Croes tin cu realisa cu na momento cu tur cos cuminsa na malo cu e Minister y cada bes ta keda resulta den problema, tension, rabiamento, fracaso ta momento pa re-evalua kico ta pasando den enseñansa. Un cos por bay malo, pero TUR cos? Tin cu saca conclusion y Urgente!

Minister Rudy Lampe no a trece su vision dilanti, cu a trece cu ne intrankilidad. Ta hopi problema a surgi y mas na caminda mirando e manera scondi y sin trasnparencia cu e ta traha. Por a mira tambe cu

no ta un fraccion so, pero dos fraccion a sali hunto pa asina apela n'e Minister pa bin cu claridad y mes ora.

Remarcabel ta cu no tin y no a haya informacion for di Minister Lampe y esaki no ta awe, pero ta peticion for di basta tempo atras y for di varios fraccion sin haya oido.

Imagina esnan den field cu ta para ta pidi esaki den un manifestacion. Tur pa falta di comunicacion, caminda por a evita hopi problema, pero e Minister a opta pa warda te final sin duna claridad na su intencionnan y ta muestra di tin cos pa tapa creando incertidumbre.

Lider di fraccion AVP, Marlon Sneek y docente di profesion:

Minister Rudy Lampe ta comiendo enseñansa na mochi

Deliberadamente a duna instruccion pa no tuma alumno na SPO



MALCONTENTO y un duda grandi di kico ta locual cu ta bay pasa p'e siguiente aña escolar ta algun di e puntonan cu e manifestantenan di diabierne a trece dilanti na porta di Parlamento. Trahadornan di Traimerdia no ta haya informacion y esaki ta di lamenta. Lider di fraccion di partido AVP y docente di profesion Marlon Sneek a conta kico den su opinion ta inaceptabel. For di un luna pasa trahadornan di Traimerdia ta canando nan caminda y sinta den e reunion cu Minister di Enseñansa sin haya contesta concreto. Un copia di un carta a keda entrega na algun Parlamentario diabierne cu a bin di parti Minister Lampe cu te ainda no a yega serca e Parlamentarionan. Cu esey ta muestra con bruha e Minister aki ta traha y ta un di e motibonan cu ta keda para riba cu ta un reunion publico ta pidi p'asina e por bin duna cuenta di kico ta su intencionnan.

Algun siman prome cu vakantie escolar ainda nan no sa kico ta nan futuro, si nan tin trabou of no, esnan di SPO si tin cu presenta na mes un edificio of nan a muda, situacion ta for di lo normal. E Minister tin cu bin Parlamento y no den comision di enseñansa, den un reunion publico pa tur hende por tende unda e Minister ta para y kico t'e direccion cu ta bay tuma. Di importancia y teniendo Parlamentario Edgard Vrolijk na su palabra, cu ta un solo Parlamento tin y cu no por sconde tras cu ta Minister di coalicion, sino mas bien tin cu informa kico e ta haciendo. Den un encuentro Parlamentario a pidi plan/vision, pero te

dia di awe no por haya nada for di e Minister, unicamente por a comporba cu e ta traha ad hoc, cu ta inaceptabel!! Faltando un siman so mas pa Minister tuma decision ta keda e inkietud si acaso agenda di Parlamento lo ta druk pa yama un reunion publico.

Segun Parlamentario Marlon Sneek, esaki mester ta posibel y mas liher cu ta posibel. Aunke tin reunion di IPKO final di siman ta resta e comienso di siman pa yama esaki, pero e prerogativo ta keda den man di e Presidente di Parlamento.

PRIORIDAD

Tin cu duna cada manifestante e oido y respet. Cu e manifestacion nan a bin expresa nan preocupacion cu ta bibando pa mas di un luna caba y ta merece di haya informacion VERIDICO kico realmente ta bay pasa cu nan y cu Enseñansa en general.

A tuma nota cu e Minister a kita "huiswerkbegeleiding", na momento cu e aña escolar nobo drenta ken lo ocupa su mes di esaki mirando cu no a kita huiswerk for di enseñansa, a kita esnan cu ta duna training/ guia n'e group leaders cu ki meta y sin consulta cu esnan den field.

Algun di e hustificacion/ehempel di e Minister lo ta cu SPO tin cu *merge* mirando cu nan no ta yena na 100 mucha y cu esey no lo recibí subsidio, cual NO ta berdad. Pa contradeci esey por mira ehempel di scol adventista pariba di brug cu ta 38 mucha y ta ricibí subsidio.

Den e mes un contradiccionnan aki tin e instruccion di e Minister pa no manda alumnonan di Emma School, Caquetia School, Paso pa Futuro cu ta pasa test pa bay SPO pa no manda, pero mas bien laga nan continua na klas 7, tur esaki deliberadamente pa no yega n'e cifra menciona di 100 alumno pa SPO. Parlamentario Marlon Sneek ta considera esaki algo Diabolico, loke un ex-pastoor ta haci. Minister Rudy Lampe tin cu sali afo y bisa kico ta su maneho y punto. Stop di sconde tras di triki y hinca enseñansa den problema, cual ta condenabel den otro paisnan caminda indiscutiblemente t'e futuro.

Ta kibra e oportunidad di cada estudiante y existencia di bo pais, pasobra ta enseñansa t'e base fundamental. E Minister aki no tin estructura y e tin tur hende man na cabes, ta locual cu Marlon Sneek a bisa na final.

Parlamentario Sue-Ann Ras (MEP):

Ta un tata ta un responsabilidad pa bida!



AYERA nos ta celebra Dia di Tata y Parlamentario Sue-Ann Ras ta desea di comparti un reflexion di e rol di un tata di bida di nos muchanan.

A pesar cu comercio no ta merca-dea Dia di Tata optimalmente, ta un bon momento si pa nos puntra nos mes, kico ta nifica ta un berdadero tata y no djis engendra yiu, lubidando riba e responsabilidad mutuo den tur aspecto y desaroyo di e yiu(nan) involvi.

BON TATA

E imagen ta un 'bon tata' ta ampliamente difundi pa cada sociedad y nos no ta un excepcion. Ta di lamenta si, tur e casonan cu bo ta tende y experiencia, unda e ausencia fisico y emocional ta enorme den bida di nan yiunan. Si nos bay bek den pasado, unda cu e tatanan tabata e proveedor principal di famia, nos por bisa cu nan tabata percursa pa satisface tur e necesi-

dadnan material di un hogar. ZE tata no ta logra satisface e necesidadnan presente, cu ya tin otro ta presenta. Su unico meta y importancia tabata, pa wak su yiu(nan) crece, ya cu e mama tabatin e rol di atende e otro aspectonan di educa e yiu(nan).

A surpasa e tradicion como unico proveedor y nan a cuminsa comparti den e criansa di e yiu(nan), unda a crea un dimension di convivencia familiar. Nan a cuminsa participa den e cuido y educacion di e yiu(nan) y duna atencion y demuestra afeccion. "Ami realmente ta bendiciona y gradici di tabatin y tin mi tata den mi bida y sigur e ta cuadra den e rol aki; proveedor principal y semper a percursa pa brinda mi e oportunidadnan pa crece," Ras a expresa.

AUSENCIA DI FIGURA PATERNO

Sinembargo pocopoco, e rol, di un tata a haya un otro dimension scur. Nan ausencia a cuminsa bira mas, ya e bos di e tata pa duna seguridad, confiansa den bida, establece e limitenan di conducta infantil y cera e circulo di amor cu un yiu mester ta rondona di dje, a cuminsa desvanecer.

E concepto di Bon Tata a haya un percepcion nobo y ya su influencia cu ta asina poderoso den salud emocional di su yiu(nan), a pasa pa pasado. "Den tur e añanan den enseñansa, mi mester bisa cu ta di lamenta, con nan ausencia ta im-

pacta e bida di mi alumnonan. Un tata no ta djis un miembro di famia mas. Un tata ta esun cu ta busca y percursa pa e necesidadnan di mas sutil di su yiu(nan): esunnan emocional y psikico.

Nan tin cu percursa pa promove un ambiente, unda ta permiti e desaroyo optimal di e potencialidad di nan yiu(nan), poniendo un marco di libertad responsabel y no uno dominante. Nan mester percursa pa guia nan yiu(nan) sin agresividad, pero cu firmesa motiva y rasonabel y brinda nan e hermentnan necesario pa crea un fundeshi di balor, norma y principio. E

sey ta e rol di un tata y no loke nos ta experienciando na gran escala," Ras a enfatisa. Aunke no por descartar tampoco, cu ainda nos tin varios bon ehempel di tata y eseynan nos mester aplaudi y encurasha nan, pa nan conta y comparti nan responsabilidad y experiencia na otro, specialmente den nan circulo di amistad.

"Finalmente mi kier felicita tur tata, specialmente mi tata, cu semper a demonstra di t'ey pa mi den bon y malo, demostrando un amor unico y kico kieren ta un bon tata pa su yiunan. Mescos cu mi ruman homber, mi primonan, mi omonan y mi welolnan, cu ta un tata ehemplar ta percursa pa mostra nos kico ta e rol di un tata berdadero, sin importa e tempo cu nos ta aden. Un Feliz Dia di Tata y hopi bendicion!", Ras a finalisa bisando

Aruba ta conta awor cu mas persona cu a ricibi nan certificado di CPR & Choking



UN anochi di curso, di CPR y CHOKING cu a resulta e biaha aki hopi mas grandi cu tur cu a organisa anterior. Esaki tabata un EXITO SERIO. E participantenan a haya varios repiticion con pa duna CPR for di baby te cu hende grandi. Tambe con pa trata un persona cu pega cu algo den garganta. E curso di CPR y CHOKING tabata riba un nivel, con por yuda un persona cu mester asistencia te ora ayudo profesional yega na e sitio. (Call 911)

Un danki ta bay na e team di profesional cu a duna e curso, especialmente na sr. John Tromp di IMSAN cu a encabesa e curso hunto cu e profesionalnan den e ramo manera sr. Olga Tromp, sr. Joshmar Hoek y sr. Hubert de Cuba. Aruba ta conta awor cu 97 persona mas cu a ricibi nan certificado pa un total di +/- 200 ciudadano cu a pasa nan curso desde juni 2018 den Centro di Barrio Brazil.

Centro di Barrio Brazil ta bay sigui organisa mas curso di CPR y Choking, alimentacion y tambe di actividadnan fisico y salud.



Fundacion CINEARUBA nomina pa un 'Gouden C' di Hulanda

E fundacion local a ricibi e noticia cu un di nan proyecto a wordo nomina pa un 'Gouden C.'

Aña pasa CINEARUBA a realisa e proyecto 'Drama den aire' di cual e presentacion final tabata un obra auditivo titula 'E bola di fuego.' Hobenan y adultonan a forma parti di e obra aki cu a wordo presenta live riba Facebook. E proyecto 'Drama den Aire' tabata posibel door di e sosten di Fonds voor Cultuurparticipatie. E fondo tur aña ta entrega un reconocimiento na e miho proyecto den forma di un 'Gouden C' y fundacion CINEARUBA su proyecto 'Drama den aire' ta un di e cinco nominadonan pa e premio.

Nos nunca a spera e nominacion aki y e simpel hecho di ta nomina nos di CINEARUBA ta hopi contento. Asina Juan, coordinador di proyecto pa fundacion CINEARUBA a expresa. CINEARUBA kier gradici tambe tur esnan cu a forma parti di e proyecto y a duna nan tempo pa por a hacie posibel. Un danki na Melisa Richardson, Aldrich Marchena, Natasha Richardson, Teo Lopez, Milly Koolman, Adelaida Fingal, Danny Martinez, Ginelly Quandt, Rodrigo Peraza, Rotsena Pietersz, Roy Howell y Adriano Nanof.

Fundacion CINEARUBA tin nueve aña di existencia enfocando riba e sector cultural, educacional, social y creativo. Fundacion CINEARUBA ta agradecido pa tur e apoyo cu Fonds voor Cultuurparticipatie di Hulanda a sa di brinda na CINEARUBA pa asina e fundacion por a logra ehecuta diferente proyectonan na e interes y desaroyo di e comunidad di Aruba.

Entre e siman 24 pa 28 di juni Fonds voor Cultuurparticipatie lo duna di conoce cua proyecto ta ganador di e 'Gouden C' y esaki e fondo lo hacie pa medio di sorpresa esnan di e proyecto ganador. Esnan cu ta interesa den wak e obra auditivo 'E bola di fuego' por bishita fundacion CINEARUBA su pagina di Facebook.



White Joker ta sorpresa nan rumannan Black Joker cu un victoria di 8-7

CAMPEONATO HEINEKEN fast pitch di Aruba Softball Bond dedica na dos baluarte Jacobo Jansen y Gilbert “Nando” Maduro a continua riba veld di Dragon Hitters cu un tremendo ambiente y un bar y cushina bon surti. Den categoria A-Klas e dos ekiponan primoruman White Joker y Black Joker a enfrenta otro. White Joker cu a inicia campeonato tambaleando poko poko a coy su ritmo y a logra derota e ekiponan na prome y di dos laga. White Joker ta anota 3 careda den prome inning y ta amlia cu 1 careda den cabes di 4 inning. Henk Arnold solido riba minticulo a pone 3 lamonchi den e prome 3 inning nan. Den bom di 4 inning Black Joker ta corta ventaha cu 1 careda pa haci e wega 4-1. Den cabes di 5 inning White Joker ta amplia cu 4 careda pa haci e wega 8-1. Den bom di 5 inning Black Joker no kier entrega y ta rally ayuda cu 5 error pa anota 6 careda y ta yega serca 8-7. Henk sinembargo ta preta brasa di e poco cu a keda pa asina piki un victoria



importante pa su ekipo. Boxscore final White Joker 8 careda, 8 hit, 9 error cual tabata e cantidad di error dim as halto pa un wega den e temporada aki y ta laga 5 coreador na base. Black Joker 7 careda, 7 hit, 4 error y ta laga 8 coreador den circulacion. Mihor bateadornan pa White Joker ta Roderick Angela 2-1, Rajiv Cornelio 3-2 incluyendo un triple cu 2 careda anota y 1 rbi, Jhoan Ruiz 2-2 cu 2 anota y 1 rbi, Sandrick Wester 2-1 cu un doblete, Mario Kock y Arsan Wester ambos

di 3-1. Pa Black Joker a destaca na plato Oslin Bergrok 3-2 incuyendo un homerun mas 2 rbi, Roderick Simon 4-2, Burton Sintjago 3-2 cu dos careda anota mas 1 rbi y Alvaro Rodriguez di 3-1. Henk Arnold ta bayful e ruta pa seya e victoria riba su number enfrentando 30 bateador lansando 26 bola, 66 strike pa un total di 92 pitch permitiendo 7 careda di cual 2 ta limpi tras di 7 imparable ponchando un total di 5 bateador y ta regala 1 base por bola. Glenrick Marchena ta bay 4 inning y resulta pitcher perdedor tirando 27 bola, 37 strike bon pa 64 pitch permitiendo 4 careda tras di 5 hit y ta regala 3 base por bola. Lorenzo Maduro ta dreña di relevo y ta tira un inning. Weganan ta continua dialuna, diaranson, diabierna na Pos Chiquito y diamars y diahuebs na Dragon Hitters. Dragon Hitters conosi pa su pastechi sabroso y un bar bon gestock. Tin 10 wega programa pa e siman entrante di 17 pa 21 di Juni. Waak pa Bo tey!!



Jay's Tire ta traha duro pa derota Celebrities 11-10

CAMPEONATO HEINEKEN fast pitch di Aruba Softball Bond dedica na dos baluarte Jacobo Jansen y Gilbert "Nando" Maduro a continua riba veld di Dragon Hitters cu un tremendo ambiente y un bar y cushina bon surti. Den categoria AA e fuerte ekipo di Jay's Tire no tabata tin un anochi facil y mester a traha duro contra Celebrities campeon di A-Klas 2018 kendenan a subi AA e aña aki y ta dunando tur ekipo un bon bataya y dolor di cabes. Celebrities ta pica ariba 1-0 den cabes di prome inning pero Jay's Tire ta reaciona y bolter e score mesora 3-1. Celebrities ta rally pa 7 careda den di dos inning y ta bay ariba 8-4. Den bom di 3 inning Jay's Tire kedando den bataya ta anota 3 careda pa haci e wega 8-7. Den bom di 4 Jay's Tire ta anota 4 careda mas pa bolter e score na nan favor 11-8. Celebrities no ta entrega y ta rally pa 2 careda den cabes di 5 pa haci e score 11-10 pero ta keda cortico na un careda. Boxscore final Jay's Tire 11 careda, 8 hit, 3 error y ta laga



9 coreador na base. Celebrities 10 careda, 10 hit, 1 error y ta laga 9 coreador den circulacion. Jay's Tire a bay como ekipo di 18-8 pa un averahe di 444 mientras Celebrities a bay di 26-10 pa un averahe di 384. Mihor bateadornan pa Jay's Tire ta Nathan Berkel 2-1 incluyendo un cuadrangular mas 4 rbi, Sando Geerman 3-2 cu un careda anota y 1 rbi, Jerwin Peña di 3-3 incluyendo un doblete mas 2 careda anota y 2 rbi, Jowald de Cuba 1-1, Artoir Herrera di 3-1 cu un triple. Pa Celebrities a destaca na plato Jonathan Ruiz y Ruwin Tromp di 3-1,

Ozzi Webb y Gregory Manuel Jr di 2-1, Wensley Kock di 1-1 mientras Joshua Wever ta keda "hot" y ta bay di 3-2 cu 2 doblete mas 4 careda impuha. Gianmar Alders ta habri pa Jay's Tire y ta bay 1 inning y 1 tercio tirando 20 bola, 23 strike pa un total di 43 pitch permitiendo 7 careda tras di 6 imparable. Jorge Santana Cortina ta drenta di relevo y ta enfrenta 20 bateador tirando 82 lanzamiento permitiendo 3 careda di cual 1 ta limpi tras di 4 hit y ta regala 2 base por bola pa pone e victoria riba su number. Rudolf "Rudy" Angela ta bay complete enfrentando 32 bateador tirando 60 bola, 53 strike pa un total di 113 pitch permitiendo 11 careda di cual 9 ta limpi tras di 8 hit regalando 8 base por bola pa pone un otro derota riba su number. Weganan ta continua dialuna, diaranson, diabierna na Pos Chiquito y diamars y diahuebs na Dragon Hitters. Dragon Hitters conosi pa su pastechi sabroso y un bar bon gestock. Tin 10 wega programa pa e siman entrante di 17 pa 21 di Juni. Softball competitivo a la carga!!



Posicion di Gobierno di Coursou den acuerdo di crecimiento cu Hulanda

WILLEMSTAD – Durante di un conferencia di prensa extraordinario – usando medionan digital – e delegacion di Gobièrno di Coursou a duna bibo y directo for di Hulanda un relato tocante e último desaroyonan relacioná cu un posibel instruccion pa Coursou.

Despues di e reunion cu Consejo di Minister di Reyno, caminda a yega na un acuerdo cu ta posponé e desicion si ta yega asina leu pa duna instruccion, Promé Minister Rhuggenaath a duna un resumen di tur suceso cu a tuma lugá inicialmente na e reunion aki. Clave den e proceso aki tabata e combersacionnan cu a tuma lugá cu Secretario di Estado di Asuntonan Interior y Relacionnan di Reyno Raymond Knops, caminda Coursou ya por a cuminsá trece su posicion dilanti.

Esaki a resultá den un invitacion personal di sr. Knops pa ricibí e delegacion di Gobièrno di Coursou na Hulanda, asina por sigui combersá personalmente cu otro.

Minister Suzy Camelia-Römer seguidamente a duna un splicacion riba contenido y consecuencia di e desicion di diasabra, tanto riba tereno hurídico como pasonan cu Gobièrno di Coursou awor mester bay tuma. Minister Camelia-Römer a pone énfasis un biaha mas riba posicion di Gobièrno di Coursou pa muestra Hulanda cu Coursou no ta mira necesidad di un instruccion.

Gobièrno di Coursou den e caso akí a trece cla dilanti cu e paquete di un acuerdo di colaboracion pa cu e Strategia di Crecemento combiná cu un instruccion, manera Hulanda ta proponé, no por bay hunto. Consecuentemente Gobièrno di Coursou a duna di conocé cu si resultá cu Coursou finalmente haya un instruccion, Coursou lo bay den apelacion.

Minister Kenneth Gijsbertha, ampliando riba loke e otro Ministernan a trece dilanti, finalmente a duna un breve splicacion di accionnan cu Gobièrno di Coursou mester bay tuma pa cu e reformenan nesesario. Tin diferente paso cu Gobièrno ya a cuminsá tuma y awor



ta importante pa sigui cana e caminda cu dedicacion y determinacion, saliendo for di nos Strategia di Crecemento. Principal den esaki ta pa hunto cu Hulanda haci bon uso di e periodo benidero, promé cu e siguiente reunion di Consejo di Minister di Reyno riba 5 di juli próximo, pa yega na un areglo cu ta encerá palabracionnan concreto con ta bay implementá e reformenan structural nesesario cu sosten di Hulanda.

	Website: www.awemainta.com	 AWE Mainta #1 online	
	Facebook: www.facebook.com/awemainta		
	E-mail: noticia@awemainta.com		
	Tel: 583-1400		
		Fax: 583-1444	

Sin kier ta pesimista

Corsou a haya 'rosea' di tres siman serca Hulanda

WILLEMSTAD. E delegacion di gobierno di Corsou cu a bay dilanti tòch despues di un start falso a haya un rosea di tres siman pa pone òrdo den su desòrdo financiero pa supuestamente sin e 'machete' di Knops baha sin misericordia riba gobierno di Corsou pa incumplimento di palabracion.

Lubidá tur exclamacion di 'hallelujah' y 'gloria' cu delegacion Rhuggenaath a scapa Corsou di haya Instrucion pero tur hende na su sano wisio ta realisá cu esey ta un reto imposibel pa logra.

Y si nan logra, nos lo reconosé esey pero cu reserva pasobra e sifranan cu nos a mira te ainda dje periodo cu gabinete Rhuggenaath a haya pa pone òrdo, tur ta desesperadamente negativo.

Pa ser franco, nos ta kere cu ni den tres aña ni e gobierno aki ni esun cu ta bin despues no por cambia destino di nos pais financieramente pasobra ningun dje argumentonan cu nan a usa pa supuestamente frena e machete di Knops, mayoria ta argumento falso.

Esey ta pará clarito den e carta cu CFT a manda pa gobierno dia 12 di juni ultimo y di cual parlamento tambe a haya copia pero a actua manera semper en frente di un cataclismo: 'deaf and dump'.

Pa cuminsa, ni Hulanda ni Corsou a bisa pakico a tuma e desicion aki.

Loke sí ta opvio cu Corsou a haya tres siman di tempo pa obra sin precion pa controlá su gastonan.

Y hasta riba esey tin masha diferencia di opinion: e manera cu gobierno kier logra esey ta pa duna retiro

na granèl na empleadonan cu tin contract di corto duracion manera e 'muchanan' cu ta traha na BAB p'asina baha gasto.

Pero den mesun rosea 50% dje ministernan di Corsou a duna e mal ehèmpel di hisa nan bulchi bay Hulanda y Suiza.

E pregunta cu ta surgi ta: pakico tin un Minister Plenipotenciario na Den Haag.

E no ta sirbi ni como 'postbode'? Pasobra segun nos a comprendé, ta den un combersacion di un ora Knops a 'slèk' e machete di Damocles y sobrá di tempi nan a 'chat' cu gruponan Curasoleño pa splica nan e situacion penoso cu Corsou t'aden, algo cu nan sa acaso mihó cu e ministernan mes.

Of acaso e actual representante Paul Comenencia y e ex-representante dr. Wawoe ta sinta wak Netflix henter dia?

E dicon nos ta interpretá e situacion asina ta simpel: logico cu e gastonan pa cuater minister bay Europa – tres a bay Hulanda y un a bay Genève – ta un gota riba e plachi cayente di caha di gobierno.

Si nan a bay of keda sin bay nada ta cambia ne cuadro financiero manera nos lo ilustra den un siguiente relato.

Pasobra di tur pronostico cu minister di Finansa Gijssbertha a duna CFW cu lo reduci e deficit di ultimo añanan y esun di aña pasá y cu hasta lo tin superavit, esta cu lo cobra sèn riba presupuesto, e realidad Maquiavelico Corsou t'aden ta cu e deficit lo ta riba 200 miyon florin contando 2017 y 2018 aden.

**SINTONISA TUR MERDIA,
RADIO GALACTICA 99.9
PA SCUCHA NOTICIA PRESENTA PA**

**VICTOR (TOKO) WINKLAAR,
ALEXA WERLEMAN Y SIMON ARENDS.**

Den Noticia

GFM 99.9

Palabracion cu Gobièrno tin relacioná cu instruccion

WILLEMSTAD/ DEN HAAG – Diabierna den oranan trempan di mainta Hulanda y Corsou a yega na palabracionnan pa yuda Corsou recuperá financieramente.

Ta trahando na un areglo conhunto cu ta enserá palabracionnan concreto pa loke ta trata e reformenan structural nesesario cu Corsou mester implementá, entre otro riba tereno di economia, finansa público y e aparato gubernamental.

Ambos pais ta realisá cu esaki lo tuma su debido tempo y tambe cu e ta difícil pa realisá sin e sosten nesesario. P'e motibo akí Hulanda kier ofrecé un perspectiva fi-

nansiero concreto cu ta yuda Corsou den su afan pa implementá e plannan como parti di e Strategia di Cresemento di gabinete Rhuggenaath.

Lo presentá e acuerdo akí dia 5 di jüli benidero. E sosten lo cana similar na e periodo cu Corsou mester pa por implementá e reformenan nesesario.

Colegio di Supervicion Finansiero (Cft) a consehá Consejo di Minister di Reyno pa duna Corsou un instruccion.

Hulanda a warda un rato cu esey y e desicion definitivo pa cu esaki lo tuma lugá den e reunion di Consejo di Minister di Reyno planiá pa 5 di juli benidero.

Investigacion relacioná cu curpa sin bida cu a topa riba laman

WILLEMSTAD - Relacioná cu e curpa sin bida cu diadomingo 9 di jüni 2019 personal di Guardacosta a saca for di laman na mas o ménos 5 miya for di altura di Bullenbaai, investigacion den e caso aki a continuá.

For di autopcia riba e curpa aki, por a concluí cu e hòmbler aki a hoga.

Despues di e topa cu e curpa sin bida aki, diferente informacion a cuminsá circulá, cu lo mester tabatin un incidente riba laman cu un boto for di Venezuela rumbo pa Còrsou, cu tabatin un cantidad considerabel di persona a bordo. Tambe e versionnan ta indicá mas leu, cu lo tin mas víctima.

E informacionnan aki a yega na conocimiento di Polis tambe, pero te n'e momentonan aki e investiga-



cion táctico no a finalisá. Pues Polis no por confirmá e versionnan aki. Entre tanto a cuminsá cu e proceso di identificacion di e víctima y

asina cu esaki tambe ta cla y famia di e víctima wòrdo pone na altura, Polis lo duna e nòmber liber. E caso aki ta sigui den investigacion.

Ta trata aki di e caso 'India'

Amal Sujalekshmi, esun mas pisa sentencia den caso di secuestro

WILLEMSTAD. Tres ciudadano a presentá den sala di corte pa responsabilisá nan mes den caso di un secuestro cu a tuma lugá dia 4 pa 5 di janüari 2019.

Ta trata aki di un hòmbler di 21 aña di edad, nacé na India cu yama Amal Anil Sujalekshmi,

Gideon M di 23 aña di edad y Guiseppe B di 24 aña di edad. E protagonista principal den e suceso horibel aki ta Amal Anil Sujalekshmi, kende a crea e plan macabre pa laga secuestrá un otro ciudadano compatriota di dje (tambe di India), di inicial S.M, kende ta estudiante di un prestigioso instituto médico aki na Corsou.

E caso aki a haya e nòmber "India".

Manera a bini padilanti diabierna den sala di corte Amal Anil Sujalekshmi tabatin sierto debenan y tabata den un situacion financiero teribel, pero a inventá un manera pa kita for di su debenan dor di laga secuestrá e estudiante S.M cu e propósito pa gana e suma di 100.000 dòllar Mericano for di e mayornan di S.M.

Manera ta conosí S.M. ta na Corsou pa sigui un estudio medico siendo aparentemente di un famia cu hopi placa.

E acusado Amal Anil Sujalekshmi a trata na gana S.M. na bòrchi y a encargá Gideon y Guiseppe pa pasa piki e víctima na bòrchi, caminda esaki tabata wardando riba Amal Anil Sujalekshmi, manera a keda palabrá.

E caso aki tabata ampliamente den publisidad, a keda comentá den corantnan y tambe na radio-emisoranan. Enfin tabata dia 4 di janüari 2019 cu Gideon y Guiseppe a core yega den un auto blanco na bòrchi den sercania di Ser'i Loraweg, baha for di e vehículo y ranca SM hinca den e auto bay cuné na un flat.

Di aki a sigui hinter un hazaña di mara e víctima na man cu pia y tapa su cara. Riba instruccion di Amal Anil Sujalekshmi a transportá SM hiba na un apartamento, caminda e mesun Amal Anil Sujalekshmi aki a regla tur cos pa por a tene SM prezo. A kita SM su telefon for di dje pa start e deliberacionnan via whatsapp cu mayornan di SM, poniendo un enorme precion pa trata na logra e suma di 100.000 dòllar for di e mayornan, pasobra a bisa e mayornan flat cu nan mester paga 100.000 dòllar Mericano si nan kier haya nan yiu SM (secuestrá) bibo.

Ademas a bisa e mayornan pa informá polis cu nan mester keda trankil, pasobra SM ta na caminda pa regresá India. Tanto e cómplisenan Gideon como Guiseppe a conta hues señora mr. Edelenbos tur detaye di e secuestro, splicando cu nan tabatin hopi miedo y preocupacion, pasobra Amal Anil Sujalekshmi a demostrá capas pa cometé cualkier barbaridad y haci SM hopi dayo.

Gideon den principio a sirbi como chauffeur, siendo Guiseppe tabata esun cu a ranca SM bay cuné hiba den auto, siendo pará ta warda na bòrchi di bùs riba Amal Anil

Sujalekshmi.

Mas cu claro a sali na cla cu Gideon y Guiseppe tambe a coperá pa realisá e plan macabre aki, producí pa Amal Anil Sujalekshmi, kende tabatin un sita cu SM pa top'é na bòrchi di bùs riba Seroe Loraweg.

Amal Anil Sujalekshmi despues a hunga ròl manera e no sa di nada y cu e no a mira SM na bòrchi. Aki a haya e slòfnan cu SM tabatin bistí ora el a sali cas dia 4 di januari 2019, den oranan di atardi. Natural Amal Anil Sujalekshmi a manda Gideon y Guiseppe riba e víctima pa secuestr'é.

Punto ta sinembargo cu Amal Anil Sujalekshmi sí tabata determiná y dispuesto pa eventualmente haci cosnan hopi robes cu SM si tabata nesesario.

Mester gradicí Dios cu ta 2 dia so e secuestro a dura, pasobra un amiga bibá den e cas hunto cu SM a logra pone polisnan na tempo na altura y S.M a logra core bay, aunke e trio a gar'é despues, pero SM a bolbe scapa di e secuestradónan.

Finalmente polis a cay aden y ta door di e resistencia fuerte di SM a bini un fin na e secuestro, pasobra mesora a sospechá Amal Anil Sujalekshmi di ta e protagonista principal di e secuestro.

Tabata dia 5 di janüari pa 9 or di anochi cu e víctima a cana yega pia abou y cu pañanan tur sushi na warda di polis. SM a conta cu a secuestr'é hiba promé den un compleho di apartamentonan cu parce esun di Amal Anil Sujalekshmi, pa dje transport'é pa un cas den área di Mambo Bich.

Fiscal mr. Guillano Schoop a hiba palabra na nòmber di Ministerio Público y fiscal mr. Guillano Schoop tabata amplio y exacto den su presentacion di e caso diabierna den sala di corte.

E fiscal final di cuenta a demandá un castigo di prizon di 42 luna di cual 9 luna pa condicional pa Amal Anil Sujalekshmi y pa tanto Guiseppe como Gideon un castigo di prizon di 36 luna di cual 12 luna condicional.

E acusado Amal Anil Sujalekshmi tabatin pa su defensa hurídico abogado seyora mr Sophia-Alendy, miéntras Guiseppe B tabatin abogado seyora mr. Eysden y finalmente Gideon M tabatin abogado seyora mr. Marije Vaders pa defendé.

Hues mr. Edelenbos kende ta conoci como un di e huesnan man duro ora ta trata di inhusticia contra di hende muhé a pone castigo un poco mas halto pa Amal Anil Sujalekshmi esey a resulta 42 luna totalmente incondicional, pa Guiseppe B y Gideon M ambos 36 luna di castigo di prizon di cual 6 luna condicional.

Natural e trio lo keda bou di guia di Reclassering y eventualmente lo ricibi tratamiento contra di nan adiccion na marihuana.

A gara Erica Galves Rios den intento pa transporta US\$75.773,00



WILLEMSTAD. Un señora Colombiano cu yama Erica Galves Rios di 39 aña di edad diabierna a presentá den sala di corte pa motibo cu dia 22 di febrüari 2019 a gar'é na aeropuerto Hato rumbo pa Venezuela y cu destino final Colombia, cu un suma grandi placa cu e tabata transportá ilegalmente.

Ta trata aki di en total 75.773 dòllar Mericano. Na momento cu a tira un còntrol na aeropuerto Hato a bin sa cu e señora aki su curpa tabata tur di placa cu biyetenan di dòllar Mericano. Bou di masha yoramento diabierna den sala di corte Erica Galves Rios a divulgá cu el a cometé e acto castigabel aki bou di presion y menasa.

El a bisa cu ta un persona aki na Corsou mes a mand'é cu e placa ey pa biaha pa exterior, aunke e no a mencioná nòmber di e persona en cuestion.

Remarcabel ta cu e mesun avion cu e acusado a tabata biahando pa Venezuela, e casá a yega Corsou. Por saca e conclusion cu e duo aki tabatin algo planiá.

Fiscal mr. Janssen ta sali for di e punto di bista cu mester ta trata aki di placanan ilisito atcerí esta, pla-

canan di droga òf otro actonan malisioso.

Ta papia aki di labamento di placa y transportacion ilegal di un suma asina cuantioso. Fiscal mr. Janssen a demandá un castigo di prizon di 18 luna di cua 6 luna condicional y un periodo di prueba di 3 aña.

Hues mr. Gruijters sinembargo, teniendo cuenta cu e circunstancia personal crítico di Erica Galves Rios, esta mama di yiu menor di edad etc., a yega na un castigo di prizon mas abou, esta di 6 luna incondicional. Abogado mr. Everret Wilsoe tabata encargá cu e defensa di Erica Galves Rios y a pone hopi énfasis riba e circunstancia personal di e cliente aki, loke finalmente a duna resultado den forma di un castigo relativamente suave.

Ta anticipá cu djis ey e señora por sali for di prizon di manera cu pronto e por ta bèk na Colombia.

Hues lo studia caso di duo hóben gará cu arma di candela

WILLEMSTAD. E ciudadanonan Isahir Louisa di 19 aña di edad y

Ichel Deonísio di 20 di edad, polisnan a gara cu arma di candela dia 31 di maart 2019 den un auto manehá pa Isahier Louisa. Claramente por a nota cu Ichel Deonísio tin dominio total riba Isahier Louisa, kende Deonísio tabata kier pa esaki confesá cu ta su arma di candela.

Isahir Louisa simplemente a sigui nenga cu e ta doño di e arma di candela, sin kier a bisa ta ken sí ta e doño, esta Ichel Deonísio. Na warda di polis Isahir Louisa a declará anteriormente cu ta Ichel Deonísio ta doño di e arma di candela.

Den sala di corte e acusado a sigui pone tur sorto di presion posibel riba Isahir Louisa, kende na polisnan a admití cu e tin hopi miedo di Ichel Deonísio.

Final di cuenta abogado señora Alicia Blonk a pidi pa separá e acusadonan for di otro. Hues a dal un stap mas leu dor di laga Isahir Louisa huramentá y asina ey no a keda nada otro pa Isahir Louisa reconocé cu e arma ta di Ichel Deonísio, kende anteriormente autoridadnan a gara caba cu arma di candela.

Fiscal a pidi un castigo di prizon di 24 luna incondicional pa Ichel Deonísio y pa Isahir Louisa cu castigo di prizon di 24 luna di cual 12 luna condicional.

Ámbos ta uzadónan di marihuana. Hues mr. Gruijters a keda cu dia 5 di jüli binidero lo e dicta sentencia despues di studia e caso aki mas.

Royal Aurora Funeral Home & Crematory

Tur cos aki na mundo tin su ora y su tempo,
Ora pa nace y ora pa muri, ora pa yora y ora pa hari,
Ora pa keda keto y ora pa papia, ora pa stima y ora pa odia,
Ora pa guerra y ora pa paz"
Predicador 3:1, 2, 4, 7, 8

Cu dolor na nos curason, nos ta anuncia fayecimento di nos ser kerí:



**Sra. Monica
Filomena Croes-Kelly**
*04-05-1943 - †15-06-2019

Acto di despedida lo wordo anuncia despues

Royal Aurora Funeral Home & Crematory

Gradicimento

Pa medio di esaki famia kier a gradici tur esnan cu di un manera of otro a muestra nan atencion y duna nos sosten durante fayecimento y despedida di nos defunto stima:



Digna Margarita Flanegin
Cariñosamente yama: 'Deka'

Nos kier a gradici henter famia, bon bisiñanan, amiga(o) nan, conociman, Su rumannan di The Upper Room Ministries .

Su amiganan stima: Tina Almary y Janelle Vlaun. Zuster- y docterman di oncologie afdeling, Koningin Wilhemina Fonds, sra Lilly Prince, zuster Lola Geerman, Zuster Ita Ridderstaat, Mary Joan Foundation, dr di cas Dr. Anthony y Aurora Funeral Home pa nan bon servicio.

Royal Aurora Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forza".
Salmo: 23



Fridoline Veronica Fingal
*28-01-1940 - †15-06-2019

Acto di entierio lo wordo anuncia despues

Royal Aurora Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Weaver.

Cu dolor na nos curason, nos kier anuncia fayecimento di nos kerida esposa, mama y wela:



**Sra. Rosa Caritina
Tromp-Franken**

Mihor conoci como "Jojo" or "Rosa di Tilin"
*06-10-1941 - †14-06-2019

Acto di entierio lo wordo anuncia despues



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL